

# 1 Tesalonaika

## Okoro buk nukan onoktapau

Jisas ko meienuk, woisan 20 orip manonuk, Pol ko Tesalonaika mena Jisas nukan ämän tamare rawonus, Korin mena pote rawon. Ko kiro opok raunuk raunuk, Timoti nukas pote keser auruwon, “Tesalonaika menan roasiret akan woiaka Jisas mesin epar moin akan onok eposek, utianik, karauk Juda roat akas ak pak iwäi maroi.” Pol ko kiro ämän roumoi, kiro pakan Kristen roasiret woiaka sakau maraun jer we marowon. Ko akan woiaka epar moin keseriar sakau me rauna, Jisas ko ätäi kowai rai awarowon.

### Okoro buk tainoraun ämän

- 1:1 Pol nukas Tesalonaika roasiret woiaka ereraun ämän awarowon.
- 1:2–3:13 Kiro roasiret akan woiaka Jisas mesin epar moin kiro sakau me rauna, Pol ko kiro ämän roumoi, ak mesin kon wou näwäu ererwon.
- 4:1-12 Tesalonaika roasiret akan woiaka epar moin kiro sakau me rawaun Pol nukas sakau ämän awarowon.
- 4:13–5:11 Jisas ko ätäi koumoi, owosewarai kiro ämän Pol nukas awarowon.
- 5:12-22 Pol nukas Näwäu ko ätäi kowai rai awarowon.
- 5:23-28 Pol kon ämän erekapu patarwon.

<sup>1</sup> Is Pol, Sailas Timoti ori, ikes ak Anut nukan roasiret Tesalonaika mena rai jer we marom. Momonek Anut, pak iken Näwäu Jisas Kraiss mesin akan woiaka epar me rai. Anut nukas kon wou

näu oripas ak sarwareanik, akan woiaka paurar rawaun marai.

*Tesalonaika menan roasiret ak akan woiaka epar momoi, rapor raiäi.*

<sup>2</sup> Ik omre orip orip ak mesin ronkateanik, Anut aurmoi, ko 'pere' auriäum. <sup>3</sup> Akan woiaka epar momoi, sarau sakau miäi. Akan woiakas jau-nakat mesin meiemoi, sarau näwäu senes miäi. Ak akan woiaka sakau momoi, iken Näwäu, Jisas Krai ätäi kowai mesin kume raiäi, okon, ik akan onok kiro ronkateanik, iken momonek, Anut 'pere' auriäum.

<sup>4</sup> O jaunokot, ik äpu, Anut nukas akanun wous meiemara, ak kon roasiret senes saräun sare marowon. <sup>5</sup> Ik Anut nukan Ämän Eposek ak awaraun oi potomun. Utianik, ik kiro ämän aremun kiro erar ämän wa, kiro ämän Osou Näu nukan sakau orip. Iken woiok kiro ämän mesin epar momun kiro ak ätär maromun. Ik ak pak raumoi, kiro onok ak sarwaraun keser-mun. <sup>6</sup> Ak iken onok pak Näwäu nukan onok pak tainorin. Kesermana, ak usu sosop senes oin. Utianik, Osou Näus ak woiaka ereraun sakau aronuk, ak kiro ämän oin. <sup>7</sup> Keserna, woiaka epar moin roasiret ak Masedonia provins pak, Akaia provins pak rai akas akan onok eposek miäin aparianik, tainoriäi. <sup>8</sup> Akan woiaka Anut mesin epar moin, Näwäu nukan ämänis kanam jejep senek ak pakas karauk omsau erekapu potonuk, roin. Kiro ämän ak mesin Masedonia provins pak Akaia provins pak karar potau wa, omsau erekapu pote iporwon. Keserianik, ik akan woiaka epar moin mesin kar ämän awarau

senek wa. <sup>9</sup> Owon, ik ak pak pote raumun ses opok roasiret erekapu akas ak mesin keser äiäi, “Kiro roasiret akan ämän roianik, ak sät eitek jou miäin utomoi, rusapai epar eit jou mururai. Ak epar Anut awau rau nukan sarau karar mururai. <sup>10</sup> Ak kon Mokoi omar oikas kowaun rai kume rai.” Anut nukas kiro Mokoi meiewon ätäi siräi mowon. Tawa Anut nukas kon kasak päun ses opok, roasiret onok aru miäi wasarewaronuk, kon mokoi, Jisas nukas ik woiok epar momun roasiret sareikeanik, imäikai.

## 2

*Pol nuka Tesalonaika mena sarau mowon mesin äiewon.*

<sup>1</sup> Iken jaunokot, ak äpu ik ak apwarau potomun ik kiro erar potau wa. <sup>2</sup> Ik Tesalonaika mena potau wa opok, Filipai mena rauta rauta, kiro pakan roasiret akas ik usu sosop senes ikomoi, aru ämän aikoin, ak kiro onok äpu. Utianik, iken Anut nukas sareikemara, sakau ikowon. Ik Tesalonaika mena kouta, kos ik sareikonuk, aru roat akas ik aru mukauriäi ik iminewarau wa. Ik sakau tai raumoi, kon Ämän Eposek ak tamaromun. <sup>3</sup> Ik kiro ämän ak tamaromun, kiro iken ronkat pakas sepuk ämän ra, aru ämän ra awarau wa. Ik kar sät ämän ak atonwaraun keşerau wa. Wa senes, wa. <sup>4</sup> Anut nukas kon Ämän Eposek araun aikiäu ik kiro ämän karar orip orip areäum. Meter kos iken onok ate apaikianik, iken onok eposek äiewon, okon, kos ik Jisas nukan Ämän Eposek roasiret tamaraun sarau ikowon. Ik roasiret akan woiaka ereraun wa sarau miäum, ik Anut nukan wou karar ereraun sarau miäum.

Anut nukas iken woiok jekur wasare apariäu. <sup>5</sup> Ak äpu iken ämänis ak raiaka atau wa. Ik akan osap owaun ämän mau wa. Anut ko owo onok ikes keseriäumun kiro ko äpu. <sup>6</sup> Ik kar ros iken enmok jou mukaun rai kiro sarau mau wa. Ik akas ra, karauk roasiret akas ra, iken enmok jou mukaun rai sarau mau wa.

<sup>7</sup> Epar, ik Kraiss nukan ämän oi ariaum roat. Keseria, ik ak pak raianik, akas ik sareikaun sakau ämän awaraun itok, utianik, ik ak pak pote raianik, kar asires kon mokoit eteinanak kamware raiäu senek, ikes ak nais jekur kamware raumun. <sup>8</sup> Iken woiokos akanun meianik, ik woiok erer orip Jisas nukan Ämän Eposek tamaromun. Utianik, ik kiro onok karar mau wa, ik ak sarwaraun onok eposek nais kesermun, owon, iken woiokos akanun epar meieäum. <sup>9</sup> Iken jaunokot, ik ak mesin sarau näwäu momun, ak äpu. Ik sanpeu, pututu Anut nukan Ämän Eposek tamaromoi, iken o kau maun karauk sarau nais miäumun. Keseria, ikes ak kar usu wa aromun.

<sup>10</sup> Ik ak pak raumun ses opok, ik karauk onok aru ak opok mau wa, ik Anut nukan onok eposek karar tainori raumun. Keserta, kar ros ik onok aru momun äiäu senek itok wa. Iken onok kiro keseriäumun ak äpu. Anut nuka nais ko kiro onok äpu. <sup>11</sup> Ak äpu kar ros kon mokoit jekur kamwareäu senek ikes nais ak roasiret karar karar jekur kamwareäumun. <sup>12</sup> Ikes akan woiaka sakau mareanik, usu ämäiäu sakau aromoi, Anut nukan wou eraun kon onok eposek tainoraun sakau ämän awareäum. Anut nukas ak kon roasiret senes sare maromoi, ak enmak jou

orip kon inkaruru rapor rawaun urwarowon.

<sup>13</sup> Ak Anut nukan ämän roumana, tainorin, okon, ik Anut orip orip ‘pere’ auriäum. Ikes Anut nukan ämän ak siarakap oi koumun, ak roianik, kurte oin. Kiro kar ron ämän wa, utianik, kiro Anut nukan ämän. Kiro Anut nukan ämänis akan woiaka uru sarau monuk, akan woiaka epar moin. <sup>14</sup> O iken jaunokot, Anut nukan roasiret Judia provins opok Krajs Jisas pak pasar rai, ak usu oin senek, karauk roasiret akas nais ak opok keseriar keserin. Kiro roasiret akan jaunakat Juda akasar usu areäi senek, ak nais akan omsau pakan roat akasar usu aroin. <sup>15</sup> Kiro Juda roat akas Näwäu, Jisas wena, meiewon. Anut nukan ämän roianik, areain roat nais keseriar akwarona, meiein. Akas ik usu atap atap ikomoi, akan menan emeikona, manomun. Akas Anut nukan wou aru murianik, roasiret erekapu pak iwäi murateäi. <sup>16</sup> Ikes Anut nukan ämän karauk omsau pakan roasiret tamarta, Anut nukas ak imwarai rai, kiro Juda roat akas iken apu patiriäi. Kiro onok senek, rusapai akan onok aru sosop senes morai wa utiäi. Rusapai, Anut nukas kiro roat mesin kasak näwäu peu.

*Pol ko ätäi Tesalonaika roasiret apwaraun ronkatewon.*

<sup>17</sup> Iken jaunokot, ik omre katunak ak utware manomun. Ik ak pak rawau wa, utianik, iken ronkat karar ak pak rau. Ik ak utware manomun, okon, ik ätäi ak pote apwaraun rai ronkat sosop ouram. <sup>18</sup> Ik ätäi ak rawa potauriäum. Is Pol, is ak rawa orip orip ätäi potauriäum, utianik, Satan nukas iken apu patiriäu. <sup>19</sup> Tawa iken Näwäu,

Jisas kowai ses opok, kos owo osap tawa oi koi ikai, kiro osap aka karar. Keseria, ik ak pak erek kon amukup tai raumoi, iken woiok ererai. <sup>20</sup> Epar senes! Ak pakaima, iken enmok jou orip sareanik, iken woiok eposek sare mukiäi.

### 3

<sup>1-2</sup> Keserna, ik ak apwarau potaun senek wa, okon, omre rumukäu kume rawaun utomoi, iken ronkat ik Atens näu mena ikarar raianik, Timoti äsimorta, ak rawa potowon. Ko iken amunok, ko Anut nukan sarau ro Kraiss nukan Ämän Eposek roasiret tamareäu. Kos ak rawa potomoi, akan woiaka epar moin sarwareanik, akan woiaka sakau maraun itok. <sup>3</sup> Kesernuk, ak usu sosop oianik, akan woiaka epar moin ätäi wa piriraiei. Ak äpu, ik kiro usu owaun Anut nukasar sare mukowon. <sup>4</sup> Ik ak pak raianik, ika opok usu sosop päi rai awareäumun. Ak äpu kiro onok epar senes rusapai peu. <sup>5</sup> Is omre rumukäu kume rawau senek wa, okon, is Timoti äsimorta, ak rawa potowon. Kos akan woiaka epar moin kiro owo senek aparaun potowon. Isan ronkat, Satan nukas ak ate apwaronuk, iken sarau ak pak momun kiro erar sakaram, kiro onok aru.

*Timoti nukas Tesalonaika roasiret sarwarowon ämän koi äiewon.*

<sup>6</sup> Utianik, Timoti ko ak pak rawonus, ko ik siarokop koumoi, ko ak mesin ämän eposek aikowon. Kos ak akan woiaka epar mianik, karauk roasiret mesin woiakas meieäi ämän koi mukowon. Ko kar ämän keser aikowon, akas orip orip woiaka erer orip ik mesin ronkateikianik,

ik ätäi apaikaun rai ronkat sosop oiäi. Ikes nais keseriar ak apwaraun rai ronkateäum. <sup>7</sup> Iken jaunokot, ik usu sosop senes oiäum, sinuk, akan woiaka epar moin ämän eposek kis ik sakau mukiäu. <sup>8</sup> Rusapai, ik ak Năwău pak sakau pasar rain ämän roumoi, iken woiok ätäi nău sareu. <sup>9</sup> Rusapai, ik ak mesin Anut ‘pere’ auram. Ik akan onok eposek mesin ronkateanik, iken Anut nukan amukup woiok năwău ererianik, raiäum, okon, ko ‘pere’ auriäum. <sup>10</sup> Sanpeu pututu, ik ak mesin iken woiok sakau mianik, ak pote apwaraun Anut auriäum. Akan woiaka epar moin sakau wăpik sarenu, ikes ätäi ak isanwareanik, sakau maraun Anut nais auriäum.

<sup>11</sup> Iken Momonek, Anut pak iken Năwău, Jisas pak awasar iken apu sare mukosa, ik ak rawa potam. <sup>12</sup> Akas karauk roasiret mesin woiakas meieäi. Ikes Năwău aurta, kos akan woiakas meieäi onok năwău senes saräi. Kesernuk, ikes ak mesin iken woiokos meieäu senek, akas nais akan jaunakat pak roasiret erekapu mesin pak akan woiakas meieäiei. <sup>13</sup> Ak kiro onok keserna, kos akan woiaka sakau marai. Kesernuk, tawa iken Năwău, Jisas ko kon roasiret nuka mesin akan woiaka epar moin nuka pak erek kouna, ak iken Momonek, Anut nukan amukup ämän wăpik, eposek rawaiei.

## 4

*Ak onok eposek mona, Anut kon wou ererai.*

<sup>1</sup> Iken jaunokot, iken ämän pataraun kesek ämän awaraurum. Ak iken onok eposek oin, kiro

onok keseriar tainori arina, Anut nukan wou ererai. Ik äpu ak kiro onok rapor tainoriäi. Rusapai, ik Năwău, Jisas nukan enip pakas ak sakau ämän awarom, kiro onok raporiar tainorwe. Keseria, kiro onok eposek năwău saräi. <sup>2</sup> Iken Năwău Jisas nukan sakau pakaima, ak owo onok keseraun ämän aromun, ak kiro äpu.

<sup>3</sup> Anut nukan ronkat ak kon onok tainorianik, rapor tuku rawaun äiewon. Ak sapum onok maun wa ronkatău. <sup>4</sup> Ak roat karar karar akasar akan enmaksau jekur kumăun äpu maiei. Ak Anut nukan wou ereraun kon onok tainorianik, akan asiret pak eposek rawaiei. <sup>5</sup> Akan woiaka sirăianik, akan enmaksau oumoi, sepuk sepuk sapum onok wa mau. Karauk Airen roasiret ak Anut äpu wa, akas kiro onok keseriäi senek, ak wa keserau. <sup>6</sup> Kar ros kon Kristen jauk opok kiro onok aru wa mau. Ko kon jauk atonorianik, kon asir wa imăi ariău. Kar ros kiro onok aru keserai, Năwău nukas kiro ro tawa usu năwău senes nurai. Ik kiro sakau ämän meter awaromun, rusa nais ätäiar awarom. <sup>7</sup> Anut nukas ik sapum onok me rawaun urweikau wa, ik kon onok eposek me rawaun urweikowon. <sup>8</sup> Keseria, inok ro ko okoro ämän tainorau wa, ko ro nukan ämän sumkăinău wa, ko Anut nukan ämän sumkăineu. Rowe, Anut nukas kon Osou Nău ak areău.

<sup>9-10</sup> Ikes ak akan jaunakat mesin woiakas meiăun rai, jer we marau wa. Ak äpu, Anut nukas akan jaunakat akanun woiakas meiăun onok ätăr marowon, Epar senes! Akan onok kiro eposek, akan jaunakat erekapu Masedonia provins opok rai akas akanun woiakas meiăi. Utianik, ak



kiro onok keseriar keserna, nāwāu sarāun sakau awarom.

<sup>11</sup> Ak woiaka pāurār rawaun sarau sakau moinai, akasar akan sarau atap atap jekuriar kamewe. Ak jaunakat akan sarau mesin wa arāu. Ak akan ipiakasar sarau mowe. Meter ikes ak kiro onok keseraun awaromun. <sup>12</sup> Ak kiro onok keserna, karauk roasiret akan woiaka epar mau wa, akan onok aparianik, akan enmaka jōu maraiei. Ak akan sarau jekur maiei. Ak keseraiei, ak karauk osap mesin karauk roasiret wa awaraiei.

*Nāwāu nuka ātāi kowai.*

<sup>13</sup> O iken jaunokot, owo onok woiaka epar moin roasiret meiein opok pāi ak āpu maun ik kiro āmān awaraurum. Karauk roasiret ak Jisas mesin woiaka epar mau wa, osap eposek pāun kame rawau wa, ak ro meiāi ses opok, akan woiaka aru miāi. Ik kiro āmān awaraurum roianik, akan onok wa tainoraiei. <sup>14</sup> Ik Jisas ko meieianik, ātāi sirāiewon mesin woiook epar mom. Keseria, ik āpu, woiaka epar moin roasiret meiein ak Anut nukas Jisas pak erek ātāi imwarai.

<sup>15</sup> Ik rusapai Nāwāu nukan āmān tamukowon awaraurum. Kiro Nāwāu nuka ātāi kowai omre opok, ik roasiret omnokou opok awau raum amke wa potam. Meiein roasiret akas amke sirāiaiei. <sup>16</sup> Rowe, Anut nukan sarau eitek akan nāwāus sakau ur wenuk, Anut nukan pupu ur rowam. Kiro ses opok, Nāwāu nuka ātāi omar oikas kowai. Roasiret ak akan woiaka Krais mesin epar mianik, meiein, ak amke sirāianik, ātāi awau rawaiei. <sup>17</sup> Keserna, ik rusapai okoro omnokou opok awau raum, ik kiro roasiret pak

erek tururmoi, iou uruas Nāwāu omar oik tara-raun tonam. Keseria, ik Nāwāu pak orip orip rawam. <sup>18</sup> Keserianik, ak akan jaunakat akan woiaka sakau maraun okoro ämän awaraiei.

## 5

*Nāwāu nuka ätäi kowai, okon, ak sakau tai rawe.*

<sup>1</sup> O jaunokot, owo omre kiro onok päi, owo ses kiro onok päi, ik kiro mesin ak wa jer we maram.

<sup>2</sup> Ak äpu, Nāwāu nukan kowaun omre kiro päu roat akas pututu osap päu oiäi senek keser kowai.

<sup>3</sup> Roasiret ak keser äiäiei, “Rusapai omre eposek ik rapor raum.” Keser äi rauna rauna, usu nāwāu ak rawa kurte koumoi, aru marai. Kiro usu kar asir amaiwo orip mokoï an jowaun kurte tätäi oiäu senek, ak kesek usu kurte owaiei. Ak kiro usu ute imine manau senek wa.

<sup>4</sup> Utianik, jaunokot, ak pututu rawau wa. Keseria, kiro omre nukas päu ro senek koianik, ak wa atonwarai. <sup>5</sup> Ak erekapu ak sanpewan roasiret, ak arou merek opokan. Ik pututuan roasiret wa, ik kukuman pakan wa. <sup>6</sup> Kesermoi, ik karauk roasiret nini raiäi senek wa rawau. Ik siräi raumoi, iken ronkat ikasar jekur kumäu.

<sup>7</sup> Niniäi roasiret ak pututu niniäi. Roat an sakau jeäi kiro ak pututu raiaka käiäu. <sup>8</sup> Utianik, ik sanpewan, okon, ikasar iken ronkat jekur kumäu. Ik iken woiok epar mianik, iken jaunokot mesin iken woiokos meieäum, kiro onokus ik sareikaun ain siot senek miäum. Iken ronkat Nāwāu nukas ätäi koi imäikai kiro onok iken at kapa senek kureäum. <sup>9</sup> Anut ko kasak peanik, usu ikaun sare mukau wa. Kos iken Nāwāu, Jisas Kraï pakas

imäikaun sare mukowon. <sup>10</sup> Jisas ko ik mesin meiewon, okon, ik awau rawam ra, meiäm ra, ik ko pak erek rawam. <sup>11</sup> Keseria, ak akan jaunakat karar karar okoro ämän awareanik, akan woiaka sakau maraun sarwaraiei. Kiro onok rusapai keseriäi senek keseriar keseraiei.

*Pol nukas kon ämän patarwon.*

<sup>12</sup> O jaunokot, ik kar ämän awaraurum. Karauk roat ak kamuk Näwäu nukan sarau morai. Ak akan ämän jekur roumoi, tainoraiei, owon, Näwäu nukas kiro roat ak kamwareanik, tamaraun sare marowon. <sup>13</sup> Ak kiro roat akan sarau mesin ronkatemoui, akan woiakas akanun meieanik, akan ämän tainoraiei. Ak akan jaunakat pak päurar tämuräi rawaiei.

<sup>14</sup> Iken jaunokot, ik ak kiro ämän awarom. Karauk roasiret ak sarau mau wa, sarau maun sakau awaraiei. Inok roasir iminäi, akas kon wou sakau muraun auraiei. Roasiret ak sakau wäpik, akas sarwaraiei. Ak roasiret erekapu mesin woiakati mareanik, päurar päurar sarwaraiei. <sup>15</sup> Karauk roasiret akas ak opok onok aru mona rai, akas ätäi onok aru wa marau. Utianik, omre orip orip ak roasiret karar karar opok onok eposek maun keseraiei. Akan jaunakat pak karauk roasiret erekapu opok kiro onok eposek nais kir keseraiei.

<sup>16</sup> Ak orip orip woiaka erer orip rawe. <sup>17</sup> Ak orip orip Anut aurwe. <sup>18</sup> Owo onok eposek ra, aru ra, ak opok penuk, ak orip orip Anut 'pere' auraiei. Owon, Anut nukas ak roasiret Krais Jisas pak pasar rai, kiro onok tainoraun sare marowon.

<sup>19</sup> Osou Näus akan woiaka uru sarau maun keseriäu, ak kon sarau wa tämurau. <sup>20</sup> Osou Näus karauk roat sarwarnuk, akas Anut nukan ämän miäi, ak kiro ämän sauk wa mau. <sup>21-22</sup> Ak karauk roasiret akan onok pak akan ämän erekapu pak wasare aparnai, owo onok eposek kiro sakau atowe, owo onok aru kiro erekapu utowe.

<sup>23</sup> Is Anut keser aurim, ko iken woiok päurar rawaun keseriäu, keserai, kosar akan osou, totomaka, enmaksau, erekapu eposek kamwaronuk, ak kon onok tainorianik, iken Näwäu, Jisas Krai kowai ses opok, ak ämän orip wa rawaiei. <sup>24</sup> Anut nukas ak urwarowon, ko kon ämän orip orip tainoriäu, okon, ko kiro onok keseraun äiewon epar keserai.

<sup>25</sup> O jaunokot, ak ik sareikaun mesin Anut aurwe.

<sup>26</sup> Roasiret akan woiaka Jisas mesin epar moin akan ipiaka atotemoi, isan 'pere' ämän awaraiei.

<sup>27</sup> Is Näwäu nukan amukup ak sakau ämän awarom, kiro jer ak Kristen jaunakat erekapu ninare maraiei.

<sup>28</sup> Iken Näwäu, Jisas Krai nukas kon wou näu oripas ak sarwarmoi, ak pak rawai.

**Anut nukan Ämän Eposek**  
**The New Testament in the Girawa Language of Papua**  
**New Guinea**  
**Nupela Testamen long tokples Girawa long Niugini**

copyright © 1994 Wycliffe Bible Translators, Inc.

Language: Girawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

---

PDF generated using Haiola and XeLaTeX on 11 Nov 2022 from source files dated 9 Oct 2020

857654ed-60eb-5741-bcea-dd5397d3f069